



3. marts 2016

UPA 2016/49

Inatsisartut suleriaasianni § 33 naapertorlugu aaliangiiffigisassatut siunnersuut imaattoq matumuuna saqqummiuppara:

Ukiut qulit ingerlaneranni angujartuaarneqartussamik nunatsinni suliffeqarfanni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminnut peqquneqarnissaannut Inatsisartut aalajangiiffigisassaattut siunnersuut.

(Inatsisartunut ilaasortat: Kalistat Lund aamma Múte Bourup Egede, Inuit Ataqatigiit)

Tunggavilersuut:

Inuiaat namminneq nunaminni ingerlatsisuunissaminnut inorseqqajuartut nalilersimaarneqartuarnerat immitsinnullu nalileqqajuarnerput qaangerneqartariaqarpoq. Inuiattut pisinnaasarput qaangerlugu allamiut kisiisa ikiortigalugit nalinginnaasumik nunap ingerlanneqarnissaa aatsaat pisinnaalersimappat, taava iliuuseqartoqartariaqarpoq.

Ilumoorsinnaanngilarmi soorlu pisortat sullissiveqarfiini innuttaasunik sullissisussat apeqqusinnngivillugit aammalu annikillissikkiartuaarneqarnissaannik siunnerfeqarfiginagit periuuseqarfigineqarmata, naak tamanit ilisimaneqartoq, agguaqatigiisillugu sivikitsuinnarmik nunatsinniittartut aammalu pissutsinik ilisimasaqqaqarnertik patsisigalugu maanniillatsiarnerminni tunniussinnaasartagaat killeqartaqisut.

Nunatsinni suliffeqarfiit tamarmiullutik periaasioqatigiiffigisariaqarpaat pissutsit allanngortinneqarnissaat. Aningaasat ilisimalikkallu apeqquserneqanngitsumik nunatsinniit annissorneqartuarnerat taamaatussaannartut ajoraluartumik isigineqartoq iliuuseqarfigineqartariaqarpoq. Inuiaat namminersulersimagatta, tunggaviusumik sullissinerup inuiannit namminernit tamakkiisumik ingerlanneqarnissaa toraarneqartariaqalerpoq, taamaasiorsinnaanngikkutta artukkatsinnik immitsinnut inorsilluta aalajangersaanikuusimassaagut inuiaallu namminersulivikkumaarnerannik siunnerfeqarnerugaluaq qanilliarorunnaarsimassalluni.

Aalajangiunniartigu ukiut qulit ingerlaneranni pissutsit akuersaarneqarsinnaassunngorlugit aaqqissuussisoqassasoq, mamiasunnertaqanngitsumik suliffeqarfiit soqutigisaqqaqatigiillu periaaseqqaqatigiillutik aaqqeeqataasunngorlugit. Ullumikkummi kialluunniit takusinnaavaa taama ingerlaannartoqarsinnaanngitsoq. Unikaallariarluta kingumut qiviarniarta, immitsinnullu aperaluta, ukiut 37-t tulliuuttut aamma taamannak ingerlavigeqqinniarnivut? Imaluunniit alloriarnermik ersarissumik iliuuseqartoqartariaqarneranik piumasaqarluta aalajangiussis-sanerluta.

Nunatsinni aaqqittariaqakkatsinnik equngasoqartoq tamatta takusinnaavarput. Nunarput assigiinngitsorujussuarmik atugassaqarfiulersimavoq. Inuiaqatigiit amerliartorunnaarluta allaat ikiliartortut nalilerneqartalersimavugut. Inuiaqativut inuusuttut utoqqaallu sulii amerliartortut nunatta avataanni najugaqarnissartik qinertalersimavaat. Inuiaqatigiit isumalluarnartumik siunissaqarnerput attattuassagutsigu, periutsinik allannguisariaqarpugut.

Ikaarsaariarnissaq sapiissuseqarfigineqartariaqarpoq. Namminersulersimaneq aamma isumaqarpoq, nunatsinni nammineerluta ingerlatsisuunissatsinnik. Inorsaaffivut kinguaariit tullissatta kingornutiinnartariaqanngilaat, uagut pisussaaffeqarpugut aaqqiissuteqassalluta, nalunngilarpummi ajortoqartoq.

Innuttaasunut aningaasatigut allaffissornikkullu kingunerisassat:

Nunatsinni najugalinnik sulisoqarneq inunnut ataasiakkaanut iluaqutaassaaq suliffissaqartitsissallunilu.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq

Pisortanut aningaasatigut allaffissornikkullu kingunerisassat:

Tamakkiisumik aningaasatigut kingunissat

Nunatsinni najugalinnik sulisoqarneq nunatta aningaasaqarneranut iluaqutaassaaq, suleriarlutik nunaminnut uteqqinnaviangimmata. Nunatsinnilu najugaqareersut inuiaqatigiinni pissutsinik ilisimasaqareeramik, oqaatsinullu paasinninnerullutik suliffimmut tulluarsaqaarnissaat sivikinnerussalluni. Nunatsinnut aningaasaqarnikkut sipaarutaassaaq, misilittakkanillu annissuiffiunani.

Pisortanut allaffissornikkut kingunissat

Naatsorsuutigineqassaaq periusissiamik suliaqarnermi aningaasartuutit ataatsimut ukiup affaanik, tassa 250.000 kruuninik nalilimmik AC Fuldmægtigep suliaqarnissaa naleqassasoq.